

Qaanaami, Ittoqqortoormiini Tasiilamilu nunaqarfinnilu eqqaanniittuni angallatinut tapiissutit pillugit Namminersorlutik Oqartussat nalunaarutaat

Aalisarnermut aningaasaliissutinut immikkoortitat pillugit Inatsisartut inatsisaat nr. 15, 20. november 2006-meersoq naapertorlugu, Inatsisartut inatsisaanni nr. 66, 25. september 2025-meersumi § 7, imm. 3 naapertorlugu aalajangersarneqarput:

Kapitali 1

Atuuffia

§ 1. Illoqarfinni Qaanaami, Ittoqqortoormiini, Tasiilami nunaqarfinnilu eqqaanniittuni, kommunimut pilersaarutini atuuttuni killeqarfilerneqarsimasutuut, sinerissap qanittuani aalisarnermi angallatinik aalisariutinik ingerlaavartumik taasersuinissamut nutarterinissamullu tapiissutinik agguaanissamut nalunaarut atuuppoq.

Imm. 2. Taamaallaat tapiissuteqartoqarsinnaavoq angallatinik nutaanik atornikunillu pisinernut inuussutissarsiormi atorneqarsinnaasut akuerisaasunut 6 meterinit anginernit aammalu siunissami sivilunerusumi aalisarluarsinnaassuseq ingerlatiinnarumallugu aalisarluarsinnaasut nutaaliaasutullu nalilerneqartunut.

Kapitali 2

Tapiissutit

Tapiissutinik tunniussineq

§ 2. Inuit Qaanaami, Ittoqqortoormiini, Tasiilami nunaqarfinnilu eqqaanniittuni inuit nalunaarsorfianni angerlarsimaffillit angallatinik nutaanik atornikunillu pisiniarneranni tapiiffigineqarsinnaapput:

- 1) 6 aamma 9,5 meterit akornanni takissusillit raajaanngitsunik aalisarnermut atugassat pisiarinerani ataatsimut akiata 85 %-ia tikillugu imaluunniit
- 2) 9,5 meterinit takinerit raajaanngitsunik aalisarnermut atugassat pisiarinerani ataatsimut akiata 60 %-ia tikillugu.

Imm. 2. Pisinermi akimi tamarmi ilaatinneqarput:

- 1) Angallat teknikikkut pisariaqartunik ikkussuiffigineqarsimasoq.
- 2) Isumannaallisaanermut atortut.
- 3) Teknikikkut ikkussukkat allat.
- 4) Aalisarnermut atortut ingerlatsinermullu atortut tamakkununnga assingusut allat.
- 5) Pisinermut atatillugu teknikikkut aningaasaqarnikkullu pisariaqartumik siunnersuineq.

Nammineerluni akilikkat

§ 3. Naalakkersuisut tapiisnaapput piumasaralugu qinnuteqartup nammineq aningaasaliissutini uppersassagai makkunatigut:

- 1) 2% angallatinut 6 – 9,5 meterit akornanni takitigisunut, aamma
- 2) 5% angallatinut 9,5 meterinit takinernut.

Imm. 2. Nammineq aningaasaliissutitut isigineqarput:

- 1) aningaasat tigorianaanaat aamma
- 2) nalilinnik aningaasaliineq

Kapitali 3

Tuniseqqinnermi piumasaqaateqarneq

§ 4. Tapiissutit taamaallaat tunniunneqarsinnaapput aalisariut imaluunniit suliniutitut nalilik ukiuni siullerni qulini tunniunneranit allamut tunineqassanngippat. Taamaattoq tapiissutit utertillugit akilerneqarnerisigut, qinnuteqarnerup kingorna tunisinissaq Naalakkersuisut akuerisinnaavaat.

Imm. 2. Aamma Naalakkersuisut akuersissutigisinnaavaat tapiiffigineqartup angallat suliniummilu pigisat tunisinaagai, piginnittoq nutaaq tapiiffigineqarnissamut piumasaqaatinik naammassinnippat.

Kapitali 4

Qinnuteqarneq

Qinnuteqaatit imarisassaat

§ 5. Qinnuteqartut Sullissivik.gl aqutigalugu qinnuteqaammut immersugassaq immersoriarlugu nassiutissavaat. Tapiiffigineqarnissamik qinnuteqaat suliniummik nassuiaammik ilaqassaaq, makkuninnga:

- 1) Qinnuteqaatip siunertaa.
- 2) Ingerlatsineri aningaasaqarnermilu missingersuutit tapiiffigitinnissamut pisariaqartinneqartut amerlassusiinik nalunaarutitallit.
- 3) Qinnuteqartut piginnittullu amerlassusaat pillugit paasissutissat.
- 4) Pissarsiariniarneranut piffissaliussaq.
- 5) Aalisakkat aalisarneqarusuttut, atortut kiisalu aalisariut atorneqarusuttoq pillugu pingaarnertut nassuiaatit, matumanilu angallammik nutaamik atornikumilluunniit pisineq ilanngullugu.

Qinnuteqaammut uppersaatinut piumasaqaatit

§ 6. Taperneqarnissamik qinnuteqaat uppersaasorsorneqassaaq, matumanilu:

- 1) Inuussutissarsiutigalugu aalisarnissamut akuersissut.
- 2) Angallammik pisinissamut neqeroort kiisalu paasissutissat, matumanilu umiartuutigisinnaaneranut uppersaataat kiisalu Umiartorneq pillugu aqutsisoqarfimmit angallatinik atornikumik pisineri qanoq issusianut nalunaarusiaq.
- 3) Avataanit attartortitsisartunit tapersiut imaluunniit nammineq aningaasalersuinissamut allatut uppersaataat.
- 4) Suliffeqarfimmik piginnittuunermut uppersaataat kiisalu isumaqatigiissutit attuumassuteqartut.
- 5) Inuussutissarsiornermut taarsigassarsianut imaluunniit pisortanit tapiissutinut paasissutissat.

Kapitali 6

Pineqaatissiissutit

§ 7. Makku pissutigalugit akiliisitsisoqarsinnaavoq:

- 1) angallammik § 4-mut akerliusumik tuniseqqinneq, imaluunniit
- 2) pisortani oqartussanut paasissutissanik eqqunngitsunik salloqittaataasunilluunniit paasissutissiineq, § 5 naapertorlugu.

Kapitali 7

Atuutilersitsineq

§ 8. Nalunaarut ulloq 1. juuni 2026 atuutilissaaq.

Peter Borg (atsior.)

Aalisarnermut, Piniarnermut, Nunalerinermut Imminullu Pilersornermut Naalakkersuisoq

/Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut